

9. oktober 2019

UKA2019/45/122

Naalakkersuisut attartornermut inatsisissatut siunnersuutissaminni pisortat inissiaatileqatigiiffiisa attartunngortussamut inissiamik neqeroornerminni inissiaq neqeroorutertik ukiut tallimat kingulliit iluanni oqummik ajornartorsiuteqartoq paasineqarsimangaangat nalunaartalernissaannik pisussaaffiliinissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq, Sofie Geisler. Inuit Ataqtigiit)

Attartornermut inatsisissatut siunnersuutissaminni attartortut suliffimmut atatillugu inissaminnik tunineqarnerminni inissiami ukiut tallimat kingulliit iluanni oqummik ajornartorsiuteqartoq paasineqarsimangaangat attartortut inissiamik allamik tunineqarnissaminnik annaasaqaratik naaggaarsinnaalernissaannik Naalakkersuisut suliaqarnissaannik peqquneqarnissaat pillugu Inatsisartut aalajangiiffigisassaattut siunnersuut.

(Inatsisartunut ilaasortaq, Sofie Geisler. Inuit Ataqtigiit)

Inissianik attartortarneq pillugu Inatsisartut aalajangiiffigisassaattut siunnersuutit Siumumiik ima ittumik oqaaseqarfigissavagut.

Nunatsinni sualummik ukiuni maannakkut atukkatsinni silaannaq allanngorarsinnaasaqisoq ilisimaarivarput, tamassumallu aamma kingunerisinnaasarpaa oquup pinngorarsinnaanerata ajornannginnerulersarnera sualummik inip najukkap iluaniittup silaannaap isugutsernerani silaannarissakulaarneqartarsimannginneratigut.

Ukuli allarluinnaapput inissiat silatimikkut ussiissimappata, soorlu qalissiamikkut iikkamikkulluunniit. Taamaattoqarsimappammi kiffiutissat ilaatigullu qisuttai taarsertariaqalersarsarmata, taamaalinngikkaannimi oquk nungutinneqarsinnaasanngimmat.

Siulianili taariikkatsitut oquup inip iluani pinngorsinnaanerata ajornaatsuunera silaannarissakulaneratigut pinngittoortinneqarsinnaavoq, tamannalu pillugu akiuiniarnermik Naalakkersuisut aallartsitsisimanerat Siumumiik nuannaarutingaarput.

Inissianik attartortsitsisarneq pillugu Inatsisartut peqqussutaanni nr. 2-mi, 12. Maj 2005-imersumi ilaatigut allassimasoqarpoq: Namminersorlutik Oqartussat Kommunillu inissiaataanni attartortittakkani illup attartortittakkallu isumannaatsumik aserfallattaalinissaannut, kiisalu attartornerup aallartinnerani attartukkap pitsaasuunissaa aserfallattaaliunganissaalu attartortsitsisup pisussaaffingaa.



Ilanngullugu Siumumiik oqaatigerusupparput nunatsinni najungaqtut assigiimmik sullinnissaat pingaartilluinnaratsigu, ilinniarsimasuuppat ilinniarsimangippalluunniit najungaqarnikkut atungassarititaasut pitsaasuunissaat. Kiisalu akuersarneqassappat allaffissorneq annertuseriartussaavoq pissutingalugu illut ukiut tallimakkuutaartunik kingumut oqaluttualiornikkut sulianik annertusaasussaammata iluarsiinermik kinguneqanngitsumik.

Taamaattumik siunnersuutit Siumumiik tapersinngilarput, pissutigalugu inissiat kingumoortumik oqaluttuarisaanertik pillugu inoqanngittorpassuanngoratarsinnaanissaat ernumanartoqartikkatsigu naak oquk peerneqareeraluartoq. Tassuunakkummi tamassuma malitsigiinnassammagu najorneqannginnertik pissutingalugu aserfallassimasorpassuanngoratarsinnaanerat.

Taamatullu isikkoqartillugu aalajangiiffigisassatut siunnersuut itingartipparput.